

Na osnovu člana 55. Statuta općine Ilijaš – prečišćeni tekst ("Službene novine Kantona Sarajevo", broj: 20/09) i člana 99. Poslovnika Općinskog vijeća Ilijaš ("Službene novine Kantona Sarajevo", broj:2/10), Općinsko vijeće Ilijaš na svojoj redovnoj 18. sjednici održanoj dana 29. 04. 2014. godine, donijelo je:

**ODLUKU
O UTVRĐIVANJU INTERESA ZA ORGANIZOVANJE I
ODRŽAVANJE MANIFESTACIJE KULTURE, SPORTA
I TRGOVINE "ILIJASKI DANI"**

Član 1.

Utvrđuje se da je za Općinu Ilijaš od interesa organizovanje i održavanje Manifestacije kulture, sporta i trgovine "Ilijaški dani" (u daljem tekstu: Manifestacija).

Član 2.

Načelnik Općine Ilijaš će svake godine posebnim Rješenjem imenovati Organizacioni odbor Manifestacije od 7 (sedam) članova, koji sačinjavaju:

- Direktor JU"KULTURNO-SPORTSKI CENTAR I RADIO ILIJAS" -predsjednik
- Predsjedavajući Općinskog vijeća Ilijaš-član
- Pomoćnik načelnika Službe za prostorno uređenje i stambeno komunalne poslove-član
- Pomoćnik načelnika Službe za društvene djelatnosti-član
- Komandir policije Pete policijske uprave-Policijska stanica Ilijaš-član
- Rukovodilac Radne jedinice Ilijaš KJKP "Rad"-član
- Direktor OJ "Dom zdravlja Ilijaš" JU" Dom zdravlja Kantona Sarajevo"-član

Predsjednik i članovi Organizacionog odbora neće dobivati naknadu za svoj rad i angažovanje u Organizacionom odboru.

Član 3.

Manifestacija će se održavati svake godine, a vrijeme održavanja i dužinu trajanja određivat će Organizacioni odbor.

Član 4.

Organizacioni odbor je dužan sačiniti detaljan Plan i program održavanja Manifestacije sa nosiocima aktivnosti i predložiti ga Općinskom načelniku na usvajanje, najkasnije 15 dana prije početka Manifestacije.

Član 5.

Organizacioni odbor će imenovati Komisiju za korištenje i izdavanje javnih površina (u daljem tekstu Komisija), koja je isključivo nadležna za korištenje i izdavanje javnih površina u periodu održavanja Manifestacije.

Javne površine koje će se koristiti u periodu održavanja Manifestacije, a koje će se definisati posebnom Odlukom Organizacionog odbora, ustupaju se Komisiji bez plaćanja naknade za korištenje javne površine Općini Ilijaš.

Član 6.

Nosioc aktivnosti na pripremi i realizaciji Manifestacije je JU"KULTURNO-SPORTSKI CENTAR I RADIO ILIJAS".

Član 7.

Nadležne Službe za upravu Jedinog općinskog organa uprave-Općine Ilijaš, Javna preduzeća i ustanove čiji je osnivač Općina Ilijaš će JU"KULTURNO-SPORTSKI CENTAR I RADIO ILIJAS" pružiti stručnu i drugu pomoć, u cilju što uspješnije organizacije Manifestacije iz člana 1. ove Odluke.

Član 8.

Ministarstvo prometa i komunikacija Kantona Sarajevo će na zahtjev Službe za prostorno uređenje i stambeno komunalne poslove općine Ilijaš, u vrijeme održavanja Manifestacije utvrditi poseban režim saobraćaja, na gradskim ulicama u Ilijašu.

Radno vrijeme ugostiteljskih objekata u vrijeme održavanja Manifestacije je do 24,00 sata.

Član 9.

Finansijske transakcije Manifestacije vršit će se preko računa JU "KULTURNO-SPORTSKI CENTAR I RADIO ILIJAŠ", otvorenog kod Vakufske banke DD Sarajevo-poslovnica Ilijaš.

Član 10.

JU "KULTURNO-SPORTSKI CENTAR I RADIO ILIJAŠ" se obavezuje da iz prihoda Manifestacije:

1. finansira sportske i kulturno-zabavne sadržaje obuhvaćene usvojenim Planom i programom održavanja Manifestacije,
2. finansira sve ostale troškove organizacije Manifestacije.

Član 11.

Organizacioni odbor i JU "KULTURNO-SPORTSKI CENTAR I RADIO ILIJAŠ" dužni su u roku od 30 (trideset) dana od završetka Manifestacije iz člana 1. ove Odluke usvojiti Izvještaj o organizaciji, toku, prihodima i rashodima Manifestacije.

Usvojeni Izvještaj JU "KULTURNO-SPORTSKI CENTAR I RADIO ILIJAŠ" dužna je svake godine podnijeti Općinskom vijeću Ilijaš kao zaseban dio godišnjeg Izvještaja o radu i finansijskom poslovanju JU "KULTURNO-SPORTSKI CENTAR I RADIO ILIJAŠ" ILIJAŠ za prethodnu godinu.

Član 12.

Danom stupanja na snagu ove Odluke, prestaje da važi Odluka o utvrđivanju interesa za organizovanje i održavanje Manifestacije kulture, sporta i trgovine "Ilijaški dani" broj: 01/1-02-1778-12/11 od 31.03.2011.godine («Službene novine Kantona Sarajevo», broj:9/11).

Član 13.

Ova Odluka stupa na snagu danom objavljivanja u "Službenim novinama Kantona Sarajevo".

Broj: 01/1-02-_____/14
Ilijaš, 29.04.2014.godine

PREDSJEDAVAJUĆI
OPĆINSKOG VIJEĆA ILIJAŠ
DAMIR FILIPOVIĆ

O b r a z l o ž e n j e:

Pravni osnov za donošenje Odluke o utvrđivanju interesa za organizovanje i održavanje Manifestacije kulture, sporta i trgovine "Ilijaški dani" nalazi se u članu 55. Statuta općine Ilijaš – prečišćeni tekst ("Službene novine Kantona Sarajevo", broj: 20/09) kojim su definisane nadležnosti Općinskog vijeća i u članu 99. Poslovnika Općinskog vijeća Ilijaš ("Službene novine Kantona Sarajevo", broj:2/10) kojim su definisani propisi koje donosi Općinsko vijeće.

Novi prijedlog Odluke o utvrđivanju interesa za organizovanje i održavanje Manifestacije kulture, sporta i trgovine "Ilijaški dani" (u daljem tekstu:Manifestacija), neophodan je iz nekoliko razloga, prije svega: dosadašnji fiksni datum održavanja Manifestacije u periodu od 01. jula do 07. jula, ove i naredne dvije godine nije praktičan jer bi se Manifestacija odvijala u mjesecu Ramazana i ne bi dala željene efekte. Također, uočeno je da iz godine u godinu slabi interes pojedinih subjekta koji su participirali u radu Organizacionog odbora da i dalje sudjeluju u njegovom radu, tako da je predložen manji broj članova sa ranijih 11 na novih 7 članova koji su vezani tačno za osobe koje obnašaju određene rukovodeće dužnosti.

Cilj donošenja nove Odluke je i rasterećenje godišnjeg Programa rada Općinskog vijeća Ilijaš koje je do sada godišnje imalo tri programske tačke koje su se odnosile na Manifestaciju od: donošenja Zaključka o imenovanju Organizacionog odbora Manifestacije kulture, sporta i trgovine "Ilijaški dani", razmatranja Izvještaja o organizaciji, toku, prihodima i rashodima Manifestacije i donošenja Odluke o utrošku dobiti Manifestacije. Novom Odlukom data su nešto veća ovlaštenja Organizacionom odboru koji zajedno sa JU"KULTURNO-SPORTSKI CENTAR I RADIO ILIJAŠ" usvaja Izvještaj o organizaciji, toku, prihodima i rashodima Manifestacije koji će Javna Ustanova svake godine podnositi Općinskom vijeću kao zaseban dio Izvještaja o radu i finansijskom poslovanju JU "KULTURNO-SPORTSKI CENTAR I RADIO ILIJAŠ" ILIJAŠ za prethodnu godinu.

Također, cilj je da se uvede više kontrole u segmentu koji se odnosi na korištenje i izdavanje javnih površina u periodu održavanja Manifestacije.

Nosioc aktivnosti na pripremi i realizaciji Manifestacije ostaje JU"KULTURNO-SPORTSKI CENTAR I RADIO ILIJAŠ" (u daljem tekstu:Ustanova). Predlagač je ovim uvažio višegodišnje iskustvo ove Ustanove u organizaciji Manifestacije, koja je ujedno i utemeljitelj Manifestacije, prostorne i ljudske kapacitete kojim raspolaže, a prije svega da je Ustanova osnovana zbog postojanja javnog interesa za obavljanje javne službe iz djelatnosti kulture i sporta i da se već finansira iz općinskog budžeta, tako da nije potrebno izdvojiti dopunska sredstva za angažovanje novih izvršilaca u svrhu realizacije Manifestacije.

Na kraju, ovom Odlukom objedinjena su sva dobra iskustva u organizaciji ove Manifestacije proteklih godina, a na dobrobit i zadovoljstvo prije svega građana općine Ilijaš.

Nosilac stručne obrade: Služba za društvene djelatnosti

Predlagač: Općinski načelnik